

138,000 petani perlu raih manfaat

Kenaikan harga beras boleh beri rahmat kepada peserta sektor pertanian



**Meniti
Arus**

Bersama

Abdul Rahman Sulaiman

E-mel: rahmansulaiman@yahoo.com

KENAIKAN harga beras dunia sekarang yang dijangka berterusan, lambat laun akan memberi rahmat kepada lebih 138,000 keluarga petani seluruh negara dengan syarat mereka perlu lebih rajin dan bersedia mengambil inisiatif untuk menguruskan sawah masing-masing secara lebih efisien.

Walaupun harga beras di pasaran dunia meningkat hampir 200 peratus dalam tempoh kurang dua tahun dan pada akhir-akhir ini turut melonjakkan harga runcit di pasaran tempatan, harga padi pada keseluruhannya tidak banyak berubah.

Ini menyebabkan ramai petani termasuk di Kedah seperti yang dilaporkan baru-baru ini, mengeluh kerana mereka tidak dapat menikmati faedah secara langsung daripada kenaikan harga beras sekarang.

Bagaimanapun, perkara itu hanya fenomena sementara kerana satu hari nanti mereka akan menikmati harga yang lebih baik sejajar dengan kenaikan harga beras di pasaran semasa apabila tiba musim menuai di utara Semenanjung, bermula akhir bulan depan.

Menurut laporan yang diterima, petani di kawasan lain yang menuai, sudah pun menikmati harga yang lebih baik untuk hasil keluaran mereka berbanding musim lepas.

Berdasarkan catatan, harga padi di daerah Krian, Perak, pada musim menuai lalu dalam lingkungan RM650 satu tan. Ini tidak termasuk RM24.81 subsidi bagi setiap tan yang dibayar kerajaan.

Paras harga padi boleh mencecah sehingga RM1,200 tan jika diambil kira harga beras semasa. Harga runcit beras yang ditawarkan di pasaran tempatan mengikut

gred pada awal bulan ini adalah RM1.80 sekilogram bagi ST 15 peratus yang dikawal, RM3.28 sekilogram bagi gred SST 5 peratus, RM3.80 sekilogram bagi beras putih import, RM5.50 sekilogram bagi beras wangi import dan RM2.20 sekilogram bagi beras hancur import.

Kenaikan harga padi tentulah dengan sendirinya meningkatkan pendapatan pesawah tempatan yang sebahagiannya masih tergolong dalam kelompok termiskin.

Bagaimanapun, kenaikan harga saja belum tentu menjamin kesejahteraan petani apabila diambil kira faktor saiz tanah dan kadar pengeluaran yang secara relatifnya masih rendah berbanding imput pengeluaran.

Kini, ada 674,461 hektar tanah sawah yang diusahakan di seluruh negara termasuk kawasan jelapang di Mada, Kada, Kemasin/Semerak, Barat Laut Selangor, Krian Sungai Manik, Pulau Pinang dan Seberang Perak serta kawasan luar jelapang di tempat lain.

Kebanyakan daripada tanah sawah itu bersaiz kecil dan kurang ekonomik. Kadar pengeluaran purata pada 3.51 tan sehektar juga cukup rendah berbanding sasaran 10 tan yang ditetapkan di bawah Rancangan Malaysia Kesembilan (RMK-9).

Sasaran yang ditetapkan itu bukan sesuatu yang mustahil dicapai jika tumpuan yang lebih serius diberikan oleh semua pihak untuk memperkasakan sektor padi yang selama ini seolah-olah diabaikan.

Rekod menunjukkan bahawa ada petani di Selangor sudah berjaya mencapai sasaran itu dengan menggunakan teknologi moden dan pengurusan sawah yang lebih rapi.

Malah, seorang usahawan tani di daerah Krian, Perak, Sabran Halim, 61 berkata ada petani di kawasan itu sudah berjaya menghasilkan lapan tan sehektar.

Beliau sendiri yang mengusahakan beberapa hektar tanah sawah sudah berjaya mencapai kira-kira 4.8 tan sehektar, jauh melepasi kadar purata kebangsaan.

Banyak sebab mengapa sektor itu selama ini tidak menarik. Pertama ia tidak menjanjikan pulangan yang memuaskan. Malah menurut anggaran kasar, jika ditolak pelbagai jenis input yang diberikan kerajaan dalam bentuk subsidi seperti benih, baja dan subsidi harga, maka tiada sebarang wajaran ekonomi yang boleh menarik seseorang untuk menceburi bidang ini.

Di samping itu, lebih banyak kos dapat dijimatkan dengan mengimport beras yang sebelum ini boleh didapati dengan lebih murah dan mudah. Situasi itu turut mengakibatkan jumlah kawasan sawah menguncup sejak 15 tahun lalu selepas banyak tanah sawah bertukar menjadi belukar, ditukar syarat untuk projek perumahan atau ditanam dengan tanaman lain seperti kelapa sawit yang lebih menguntungkan.

Anak muda juga lebih berminat berhijrah ke kawasan bandar untuk bekerja di sektor perkilangan dan sebagainya. Akibatnya, umur purata petani Malaysia kini sudah melebihi usia persaraan. Disebabkan usia lanjut dan pulangan yang tidak seberapa, mereka hanya mengerjakan tanah masing-masing secara sambil lewa sekadar cukup makan.

Bagaimanapun, senario ini dijangka berubah mulai sekarang berikutan kenaikan harga beras. Dengan sendirinya permintaan untuk padi daripada pekilang tempatan akan meningkat dan petani juga akan terdorong untuk meningkatkan pengeluaran untuk meraih pendapatan yang lebih tinggi.

Dalam hubungan ini, kerajaan membuat keputusan dasar yang tepat empat tahun dulu apabila Perdana Menteri, Datuk Seri Abdullah Ahmad Badawi memilih untuk memperkasakan sektor pertanian sebagai salah satu penyumbang utama pertumbuhan ekonomi walaupun ketika itu harga beras di pasaran antarabangsa secara relatifnya masih rendah.

Dalam usaha meningkatkan tahap sara diri, kerajaan memperuntukkan RM1.2 bi-

lion di bawah RMK-9 untuk pelbagai agensi berkaitan padi di dalam dan luar kawasan jelapang. Ini termasuk RM8.6 juta untuk kegiatan penyelidikan dan pembangunan (R&D).

Baru-baru ini kerajaan meluluskan RM4 bilion lagi untuk memastikan bekalan makanan mencukupi dan stok penimbunan makanan diwujudkan berikutan krisis makanan yang dihadapi dunia sekarang.

Menurut Menteri Pertanian dan Industri Asas Tani, Datuk Mustapa Mohamed, sebahagian daripada peruntukan itu akan dibelanjakan untuk meningkatkan pengeluaran padi. Usaha juga sedang dibuat oleh beberapa agensi kerajaan untuk menggalakkan petani memulihkan tanah terbiar mereka.

Jelaslah bahawa jika petani bijak memanfaatkan insentif yang disediakan kerajaan, mereka pasti dapat meningkatkan hasil keluaran masing-masing.

Kini, negara mengeluarkan kira-kira 73.3 peratus daripada keperluan beras tempatan. Sekiranya petani tempatan dapat meningkatkan hasil purata mereka sebanyak sekali ganda saja – tahap yang masih rendah daripada sasaran yang ditetapkan – negara sudah mampu mencapai lebih daripada Tahap Sara Diri (TSD).

Sekiranya diambil kira, tanah baru yang diura-urakan akan dimajukan di Sarawak dan tempat lain, maka bukanlah sesuatu yang mustahil, suatu hari nanti Malaysia pula akan menjadi negara pengeksport beras.

Jika ini berlaku, yang akan turut bergembira tentulah petani sendiri di samping rakyat umumnya sebagai pengguna.

Tetapi jalan ke arah itu bukan mudah walaupun bukan mustahil untuk dicapai. Syaratnya, semua pihak termasuk kerajaan, agensi pelaksana dan petani sendiri perlu lebih serius, komited dan fokus.

Datuk Abdul Rahman Sulaiman adalah Pengarah Komunikasi Unit Perancang Ekonomi, Jabatan Perdana Menteri